

I Z V J E Š T A J

o radu Podružnice GIG-a Sarajevo

Podnoseći ovaj izvještaj svjesni smo da to činimo u godini Titovih i naših jubileja. I zato konstatujemo da je za nama 40 godina Titova perioda u razvitku Jugoslavije. Početak tog perioda označava 1937. godina, kada je dolaskom Tita na čelo KPJ, Partija izvučena iz najteže krize i postala snažnom i jedinstvenom avangardom radničke klase Jugoslavije, pa do današnjih dana, u kojima pod vodjstvom Tita utiremo put daljeg samoupravnog razvoja naše socijalističke zajednice.

Unutar navedenog perioda zbio se čitav niz sudbonošnih događaja za našu zemlju, kojim je Tito dao svoj pečat i koji su ga učinili istorijskom herojskom ličnošću.

Da izdvojimo samo neke značajnije godine i događaje.

- 1941. godina ušla je u istoriju po Titovom odlučnom "ne" fašizmu, kada je Tito poveo sve napredne i na otpor spremne ljude naše zemlje u oružanu borbu i revoluciju, koju je pobjedonosno okončao 1946. godine, u 1948. godini čulo se ponovo Titovo "ne", koje je odlučno rekao staljinskom hegemonizmu, čime je još jače utro nezavisan jugoslovenski put u socijalizam. Zatim slijede: 1950. godina, poznata po Titovom provođenju u praksu Marksove misli "Fabrike radnicima" ; 1966. godine, kada se obračunao sa birokratsko-etatiističkim pritiskom, što je doprinijelo daljem učvršćavanju Jugoslovenske zajednice bratskih i ravnopravnih naroda i narodnosti ; 1971. godina, kada je uklonio opasnost nacionalističke i gradjansko-liberalne restauracije, sačuvavši time revolucionarni lik SKJ ; 1974. godina, vezana je za Titovo ime po novom Ustavu SFRJ, kao izrazu daljeg usavršavanja i snaženja ustrojstva naše zemlje, te 1976. godina, po Zakonu o udruženom radu, kojim je još jasnije i jače zacrtao put razvoju samoupravljanja u našoj zemlji.

Uz sve to Tito je bio veliki graditelj mostova medju zemljama svijeta, borac za politiku nesvrstanosti, za ravnopravnost naroda i zemalja, za mir u svijetu.

S toga je ime Tita simbol ne samo naše revolucije, naše slavne prošlosti i svijetlije budućnosti, nego istovremeno simbol boraca u ratu i miru, i izraz humanističke vizije jednog novog boljeg svijeta za sve ljude koji se bore za svoju slobodu, nezavisnost i nove društvene odnose.

Za neprocjenjivo djelo, povodom njegovih jubileja, Skupština SFRJ jednoglasno je ispunila želju i zahtjev svih naroda i narodnosti naše socijalističke zajednice i dodijelila Titu po treći put Orden narodnog heroja.

I mi članovi SGIG Jugoslavije, možemo biti ponosni jer su naši članovi od uvijek bili nosioci progresivnog, a naše osnivanje obavljeno 1919. dakle kada je osnovana KPJ, pa jubileji SKJ /KPJ/ su u isto vrijeme i naši jubileji.

Ovdje treba naglasiti da društvene organizacije, kao što je naša, čine sastavni dio društvenih samoupravnih odnosa i izrastaju u specifičan vid samoupravljanja, preko kojeg radni ljudi i građani u pojedinim oblastima života ostvaruju širi uticaj i preduzimaju inicijative za razrješavanje niza aktivnih pitanja i problema iz našeg sveukupnog života i odnosa. Ovakvo mjesto, društvenim organizacijama daju naši ustavi, Statut SRN i Program SKJ.

Predsjedništvo Podružnice Sarajevo, izabrano 13. marta 1972. godine na Skupštini Podružnice, radilo je u sastavu:

1. Selesković , predsjednik
2. Zelović , sekretar
3. Hodžić , blagajnik
4. Dervišić , član
5. Pejić , "
6. Senjić , "
7. Bakšić , "
9. Marić , "
9. Balta , "
10. Simanić , "
11. Karabeg , "

Članovi predsjedništva Senjić i Marić su uskoro prestali sa radom radi odlaska iz Sarajeva.

Aktivnost naše Podružnice ispoljavala se u nekoliko vidova:

1. stručna i naučna predavanja,
2. drugarske večeri,
3. članarina, pretplata članstva na geodetska glasila,
4. diskusije u plenumu pojedinih akata,
5. angažovanost pojedinih članova na poslovima koji inicira SGIG-SR BiH itd.

U organizaciji naše podružnice održavano je blizu petnaest naučno-stručnih predavanja na teme: katastra, elektronskih daljinara, automatizacije u geodeziji i trasiranju, kartografije, inženjerske geodezije, fotogrametrije, satelitske geodezije itd., dakle gotovo na teme svih oblasti geodezije.

Predavači su bili nastavno-naučni radnici iz Beograda, Zagreba, Ljubljane dakle iz naših najačih centara, a kvalitet im je bio zadovoljavajući.

Do sada smo priredili tri drugarske večeri i to dvije u prostorijama JNA, a jednu u prostorijama DIT-a. Mišljenja smo da su ovi naši sastanci bili veoma uspješni, i sa tom praksom treba nastaviti.

Uz naplatu članarine vrši se i pretplata članstva na Geodetski list. Svi članovi su se automatski pretplaćivali i na to glasilo pa je broj pretplatnika zadovoljavao.

Da bi na neki način pomogli geodetskim stručnjacima u katastrima u mjestima koji gravitiraju Sarajevu vršili smo pretplatu za geodetski list za sedam katastara iz svojih sredstava.

Na početku našeg mandata uspjeli smo omasoviti članstvo pa je Podružnica brojala cca 150 članova.

Međutim, sada sa brojem članova Podružnice koji sada plaćaju članarinu, nikako ne možemo biti zadovoljni.

Ovdje moram da, kao pozitivne primjere izdvojim Geodetsku upravu, Školu, fakultete, Energoinvest, VGI, a kao negativne Geodetski zavod, ŽTP i još neke organizacije sa manjim brojem geodetskog kadra.

Posebno je nedopustiva situacija u Geodetskom zavodu, najvećoj našoj radnoj organizaciji gdje je 1976. godine platilo članarinu 8 drugarica i drugova.

Buduće Predsjedništvo mora poraditi da se ova situacija izmjeni na bolje.

U okviru Podružnice organizovane su diskusije na teme:

1. Teze Zakona o premjeru i katastru zemljišta,
2. Nastavni planovi geodetskog smjera Građevinskog fakulteta,
3. Vanredni studij na Geodetskom smjeru Građevinskog fakulteta.

Pored toga mnogi članovi naše Podružnice su aktivno učestvovali u radu na pripremama osnivanja i samom osnivanju Geodetskog smjera na Građevinskom fakultetu.

Ta nastojanja su urodila plodom i nedavno smo imali svečanost povodom diplomiranja prvog diplomiranog inženjera obrazovanog na novoosnovanom smjeru.

Zalaganje sa naše strane, da se osnuje Vanredni studij, je bilo, ali očito nisu bili sazreli uslovi za takav studij.

Međutim, uvođenjem studija uz rad i iz rada, po novom Zakonu o visokom obrazovanju, upućuje sve visokoškolske organizacije na organizaciju tog studija.

Sva ova aktivnost je splasnula nakon isteka jednog mandatnog dvogodišnjeg perioda. Članovi Predsjedništva Podružnice dobili su mnoga druga zaduženja u radnim organizacijama i ustanovama, na nivou opštine i grada.

To je sve uticalo na manju aktivnost u okviru Podružnice, te će izbor novog Predsjedništva, u novom sastavu, povoljno uticati na pospješavanje aktivnosti u okviru rada geodetskih stručnjaka Sarajeva.

Da je naša aktivnost dostizala zavidan nivo dokazuje i priznanje - plaketa koje je naša Podružnica dobila za svoj rad od SGIG Jugoslavije na Skupštini u Vrnjačkoj Banji.

U narednom periodu potrebno je usredsrediti pažnju na nekoliko pitanja važnih za naš Savez i geodetsku struku, a to su:

- omasovljavanje Saveza članstvom,
- poboljšanje materijalne baze Podružnice za normalan rad iste,
- omogućavanje normalnog rada u Domu DIT-a, uključujući svakodnevno sastajanje članstva,
- nastojanje otvaranja studija uz rad i iz rada na Geodetskom smjeru Građevinskog fakulteta,
- poboljšanje uslova rada geodetskih stručnjaka,
- rješavanje problema Geodetskog zavoda, naročito sa stanovišta prostora i kadrova,
- rješavanje prostornih problema, kadrova i opreme Geodetskog smjera Građevinskog fakulteta itd.

Namjera niti mogućnost ovog izvještaja nije bila da bude sveobuhvatan, nego samo da naznači probleme i da da podlogu za diskusiju.

SELESKOVIĆ FARUK, dipl.inž.